

Reichpredigt.

Von der zeit an haben vnser Vorfahren wieder im Finstern vnd Irrthumb gefessen (wie Israel in Egypten vnd zu Babel) bey 800. Jahre / bis der liebe Gott sich vnser Lande wieder erbarmet / vnd nunmehr vor 100. Jahren durch die disputati^on Herrn Lutheri s. vom Ablass ursach gegeben / das den Leuten die Augen wieder auff gegangen / vnd nüchtern worden auß den stricken des Satans / vnd also auch ein Licht in vnserm Lande sich angezündet / das wir des Pabsts betrug vnd Tyranny erkant / vnd die Protestirende Fürsten / vnd andere Potentaten vermögge Göttliches rechtens den Kirchen Gottes vnter ihren Adlersflügeln schusz vnd schirm gegeben haben. Also hat auch Landgraff Philips von Hessen / hochlöblich. gedechenis / nach dem er vom Reichstag zu Spier Anno 1526. wiederkommen / im selben Jahr des Sontags nach Galen (war der 21. Octobris) zu Homburg in Hessen einen Synodum gehalten / sind Ihre S. G. mit dem vornehmsten Rath / Herrn Balthasar Schrautenbach von Wittelshausen in der Person selbs erschienen ihr Bekenntnus wohl hören lassen / vnd von den Gelährten vornemlich dahin beruffen Franciscum Lambertum vnd Adamum Cratonem Welche in Lateinischer vnd Teutscher Sprache den irrthumb in der religion, wie auch die Wahrheit deutlich auß Gotteswort gezeiget / das niemand etwas beständiges dawieder auffbringen können. Darauff ist das Pappstumb abgeschafft / die hohe Schul alhier auffgerichtet / Kirchen vnd Klöster gereiniget worden. Solche Wiedergeburt aber / bis Christus ein neue gestalt in vnsern Kirchen gewinne / ist mit schmerzen zugangen / hat viel gekostet / vnd grosse anfechtung gehabt / wie dann J. S. Gn. selbs darüber viel trübsal vnd langwierige custodiam außgestanden / aber doch mit dem ewigwerenden Wort Gottes ewiglich bleibt vnd erhalten wird. In dero Fußstapffen sind die vier Söhne vnd Gebrüder weiland Landgrau Wilhelm / Landgraff Ludwig / Landgraff Philips / vnd Landgraff Georg löblich getretten / vnd das angefangene Christliche Werk gebawet vnd gebessert / darob sie auch in der gangen werthen Christenheit einen vnsterblichen Namen behalten.

Denen